

জুমুআর খুতবার সারাংশ

মুসলেহ্ মওউদ (রা.) সংক্রান্ত ঐতিহাসিক ভবিষ্যদ্বাণীর প্রেক্ষাপট, পূর্ণতা এবং আমাদের করণীয়

সৈয়দনা হযরত আমীরুল মু'মিনীন খলীফাতুল মসীহ্ আল্ খামেস (আইঃ)

বাইতুল ফুতুহ্ মসজিদ, লন্ডন, ইউকে

২০শে ফেব্রুয়ারী ২০০৯ইং

أشهد أن لا إله إلا الله وحده لا شريك له، وأشهد أن محمداً عبده ورسوله. أما بعد فأعوذ بالله من الشيطان الرجيم
بِسْمِ اللَّهِ الرَّحْمَنِ الرَّحِيمِ * الْحَمْدُ لِلَّهِ رَبِّ الْعَالَمِينَ * الرَّحْمَنُ الرَّحِيمُ * مَا لَكَ يَوْمَ الدِّينِ * إِيَّاكَ نَعْبُدُ وَإِيَّاكَ نَسْتَعِينُ * أَهْدِنَا
الصِّرَاطَ الْمُسْتَقِيمَ * صِرَاطَ الَّذِينَ أَنْعَمْتَ عَلَيْهِمْ غَيْرِ الْمَغْضُوبِ عَلَيْهِمْ وَلَا الضَّالِّينَ (آمين)

উচ্চারণঃ আশহাদু আন্ লা ইলাহা ইল্লাল্লাহু ওয়াহ্দাহু লা শারীকালাহু ওয়া আশহাদু আন্না মুহাম্মাদান আবদুহু ওয়া রাসূলুহু আন্না বা'দু ফাউযু বিল্লাহি মিনাশ্ শাইতানির রাজীম। বিসমিল্লাহির রহমানির রাহীম। আলহামদু লিল্লাহি রক্বিল আলামীন আর্ রহমানির রাহীম মালিকি ইয়াওমিদ্দিন ইয়্যাকা না'বুদু ওয়া ইয়্যাকা নাসতান্নিন ইহদিনাসসিরা তাল মুস্তাকীম সিরাতাল্লাযীনা আনআমতা আলাইহীম গাইরিল মাগযুবে আলাইহীম ওয়ালায যোয়াল্লীন। (আমীন)

হযূর আনোয়ার (আই.) বলেন, হযরত মসীহ্ মওউদ (আ.) খোদা তা'লার সেই বীরপুরুষ যাকে স্বয়ং আল্লাহ তা'লা 'জারীউল্লাহ' বলে সম্বোধন করেছেন। খোদা তা'লা তাঁকে এ উপাধি এজন্য দান করেছেন, কারণ আল্লাহ তা'লার কৃপায় শিশুকাল থেকেই মহানবী (স.) এবং ইসলামের প্রতি ভালবাসায় আল্লাহ তা'লা তাঁর হৃদয় ভরে দিয়েছিলেন। তিনি ইসলামের প্রতিরক্ষা করার কোন সুযোগ হাতছাড়া করতেন না। সকল ধর্ম সম্পর্কে তাঁর (আ.) যথেষ্ট পড়াশোনা এবং গভীর জ্ঞান ছিলো। প্রত্যেক ধর্মের মোকাবিলায় ইসলাম ধর্মের শ্রেষ্ঠত্ব প্রমাণ করার জন্য তিনি প্রতিমুহূর্ত ব্যস্ত থাকতেন। যখন ভারতে খ্রীষ্টান মিশনারীদের দৌরাত্য বেড়ে গিয়েছিল এবং ইসলাম ও এর পবিত্র প্রতিষ্ঠাতার বিরুদ্ধে তারা শত শত পুস্তক রচনা করা হয়েছিল। সে যুগে অসংখ্য লিফলেট এবং বিজ্ঞাপন বিতরণ করা হয়েছিল আর এগুলো মুসলমানদেরকে খ্রীষ্টান হতে বাধ্য করছিল। উপরন্তু এমন অসংখ্য মুসলমান ছিল যারা খ্রীষ্টান হয়নি ঠিকই কিন্তু তাদের মন-মস্তিকে ইসলামী শিক্ষার বিরুদ্ধে সন্দেহ দানা বাঁধতে আরম্ভ করে। এরপর খ্রীষ্টানদের এরূপ আক্রমণের পাশাপাশি আর্য বা ব্রাহ্ম সমাজ অত্যন্ত জোরে সোরে আন্দোলন আরম্ভ করে। তখন মুসলমানদের অবস্থা এমন ছিলো যে, অন্য ধর্মের মোকাবিলা করার পরিবর্তে তারা একে অপরের বিরুদ্ধে কুৎসা এবং কুফরি ফতোয়া প্রদানে ব্যস্ত ছিলো। তখন ইসলামের চরম দুর্দশা দেখে যদি সত্যিকারেই কেউ চিন্তিত হয়ে থাকেন এবং ইসলামের প্রতিরক্ষা করতে চাইতেন তাহলে তিনি ছিলেন হযরত মির্যা গোলাম আহমদ কাদিয়ানী (আ.)। ইসলামের বিরুদ্ধে যেসব আক্রমণ হচ্ছিল তা প্রতিহত করার জন্য তখন তিনি একটি গ্রন্থ প্রণয়ন করেন। এর নাম 'বারাহীনে আহমদীয়া'। এতে তিনি পবিত্র কুরআনকে 'প্রশী কালাম' এবং সবদিক থেকে পূর্ণাঙ্গ গ্রন্থ হিসেবে উপস্থাপন করেছেন। অনুরূপভাবে মহানবী (সা:)-এর নবুয়ত এবং তাঁর শ্রেষ্ঠত্ব প্রমাণ করেছেন এবং অখণ্ডনীয় দলীল দ্বারা প্রমাণ করেছেন। ইসলাম বিরোধী সকল ধর্মকে এটা প্রকম্পিত করে তুলেছিল।

এরপর হযূর (আই.) বলেন, ইসলামের প্রতিরক্ষাকল্পে এবং ইসলামের অনুপম সৌন্দর্য বর্ণনায় হযরত মসীহ্ মওউদ (আ.) 'বারাহীনে আহমদীয়া' গ্রন্থে যে নতুন পদ্ধতি অবলম্বন করেছেন তা দেখে অনেক মুসলমান

উলামা বিস্মিত হয়েছেন এবং এর যথেষ্ট মূল্যায়ন করেছেন। কিন্তু যখন তিনি (আ.) বিজ্ঞাপনাদির মাধ্যমে ইসলামের বাণী আরো ব্যাপকভাবে প্রচার ও প্রসার করেন তখন মুসলমানদেরও একটি শ্রেণী তাঁর বিরোধী হয়ে যায় এবং অমুসলমানদের সাথে হাত মিলিয়ে তাঁর চরম বৈরিতা আরম্ভ করে। তিনি সেযুগে ইসলামের বাণী কতটা আবেগের সাথে পৃথিবীর বিভিন্ন স্থানে পৌঁছিয়েছিলেন তা তাঁরই নিষ্ঠাবান সাহাবী হযরত মৌলভী আব্দুল্লাহ সানৌরী সাহেবের বরাতে হযরত মির্যা বশীর আহমদ সাহেব এভাবে বর্ণনা করেছেন:

সে সময় তিনি (আ.) বিশ হাজার সংখ্যায় বিজ্ঞাপন ছাপান এবং পৃথিবীর বিভিন্ন প্রান্তে সে যুগে যেখানেই ডাক যোগাযোগ ছিলো সেখানকার রাজা-বাদশা, সরকার, মন্ত্রী, উপদেষ্টা, লেখক, আলেম-উলামা এবং নবাবদের কাছে এই বিজ্ঞাপন প্রেরণ করেন। এটি সে যুগের কথা যখন তিনি মসীহ হবার দাবী পর্যন্ত করেন নি বরং ধরে নিন যে মুজাদ্দিদ হিসেবেই এই পয়গাম প্রেরণ করেছিলেন। এই বিজ্ঞাপনে তিনি ইসলামের অনুপম সৌন্দর্য তুলে ধরেছিলেন। এটা সর্বজন বিদিত, অমুসলমানরা ইসলামের বিরুদ্ধে যেসব অস্ত্র প্রয়োগ করা সম্ভব ছিলো তা সবই করেছিল।

যেভাবে আমি বলেছি, কোন কোন মুসলমানও ঈর্ষার বশবর্তী হয়ে তাদের কথায় সায় দিতে আরম্ভ করে এবং তাঁর বিরোধী হয়ে ওঠে। যাইহোক এরূপ পরিস্থিতিতে তিনি অত্যন্ত বেদনার সাথে আল্লাহ তা'লার কাছে দোয়া করেন, **হে খোদা! আমি তোমার সর্বশেষ ও পরিপূর্ণ ধর্ম এবং তোমার একান্ত প্রিয়ভাজন হযরত খাতামুল আখিয়া (সা.)-এর প্রতিরক্ষার জন্য এসব করছি। তাই হে আল্লাহ! তুমি আমায় সাহায্য কর এবং এ চেতনা নিয়ে তিনি চিল্লাকশী করার সিদ্ধান্ত নেন। অর্থাৎ চল্লিশ দিন নির্জনে নিভূতে আল্লাহ তা'লার কাছে বিশেষ দোয়া করেন, যাতে খোদা তা'লার কাছ থেকে ইসলাম এবং আ'-হযরত (সা.)-এর সত্যতার সমর্থনে বিশেষ নিদর্শন কামনা করা যায়। চিল্লাকশী কোথায় করা হবে এজন্য প্রথমে হযরত মসীহ মওউদ (আ.) ইস্তেখারা করেন এবং জ্ঞাত হন, এই চিল্লাকশির স্থান হচ্ছে হুশিয়ারপুর।**

হুযূর বলেন, হযরত মসীহ মওউদ (আ:) হুশিয়ারপুর নিবাসী তাঁর একজন বন্ধু শেখ মেহের আলী সাহেবকে পত্র লিখেন, আমি দু'মাসের জন্য এখানে আসছি। আমার জন্য নির্জন একটি বাসস্থানের ব্যবস্থা করুন, যাতে একান্ত নিভূতে সঠিকভাবে খোদা তা'লার ইবাদত করা যায়। তিনি তাঁর সাথীদের এবং তাকে (বন্ধুকে) বলে দেন, এই সময় কেউ যেন আমার সাথে সাক্ষাত না করে। কোন মোলাকাত হবে না। যাহোক শেখ সাহেব তার একটি বাড়ী, যা শহরের বাইরে ছিল এতে তাঁর থাকার ব্যবস্থা করে দেন। তিনি (আ.) ১৮৮৬ সনের ২২শে জানুয়ারী চিল্লাকশীর উদ্দেশ্যে সেখানে পৌঁছেন এবং সেই বাড়ীর দোতলায় থাকার সিদ্ধান্ত গ্রহণ করেন। যেভাবে আমি বলেছিলাম, তিনি আপন সঙ্গীদেরও বলে দেন, যেন তাঁর সাথে কেউ সাক্ষাত না করে আর তাদের মধ্য থেকেও কেউ তাঁর সাথে কথা না বলে। কিন্তু যখন খাবার-দাবার নিয়ে আসবে তখন তাঁর কক্ষে রেখে দিলে, ক্ষুধা পেলে তিনি খেয়ে নিবেন। মোটকথা এই চিল্লার সময় আল্লাহ তা'লা তাঁকে অনেক কাশ্ফ বা দিব্যদর্শন দেখান। সুতরাং ১৮৮৬ সনের ২০শে ফেব্রুয়ারী তিনি সেখান থেকেই একটি বিজ্ঞাপন প্রকাশ করেন আর তা বিভিন্ন অঞ্চলে প্রেরণ করেন। এতে অনেক ভবিষ্যদ্বাণী ছিলো যা আল্লাহ তা'লা তাঁর জীবদ্দশায় অত্যন্ত মহিমার সাথে পূর্ণ করেছেন এবং কোন কোনটি পরেও পূর্ণ করেছেন। যেহেতু জামাতের মধ্যে ২০শে ফেব্রুয়ারী উপলক্ষ্যে প্রতিবছর একটি জলসার আয়োজন করা হয়, তাই আমি এই অংশ নিয়ে এর গুরুত্ব এবং কী মহিমার সাথে এটা পূর্ণ হয়েছে তা সম্পর্কে কিছুটা আলোকপাত করবো। আজও কাকতালীয়ভাবে ২০শে ফেব্রুয়ারী। আর তিনি (আ.) এদিনেই মুসলেহ মওউদ সংক্রান্ত ভবিষ্যদ্বাণী অর্থাৎ তাঁর এক পুত্র সন্তানের জন্ম এবং তার বিশেষত্ব সম্পর্কে ভবিষ্যদ্বাণী করেছিলেন। যেভাবে আমি প্রারম্ভে বলেছি, এই প্রতিশ্রুত পুত্রের জন্ম সংক্রান্ত ভবিষ্যদ্বাণী সেই দোয়ার সময় আল্লাহ তা'লার কাছ থেকে জ্ঞাত হয়ে তিনি করেছিলেন, যখন তিনি ইসলামের শত্রুদের মুখ বন্ধ করার জন্য আল্লাহর কাছে ইসলাম এবং ইসলামের পবিত্র প্রতিষ্ঠাতা (সা.)-এর সত্যতার নিদর্শন কামনা করেছিলেন। সুতরাং এই ভবিষ্যদ্বাণী কোন সাধারণ ভবিষ্যদ্বাণী নয়। বরং এই ভবিষ্যদ্বাণী এবং এই ভবিষ্যদ্বাণীর সত্যায়নকারীও এ যুগে ইসলামের শ্রেষ্ঠত্ব প্রতিপন্ন করার এক জ্বলন্ত

নিদর্শন এবং এটিও আল্লাহ তা'লার আশ্চর্য মহিমা! যে বছর হযরত মসীহ মওউদ (আ.) বয়'আত গ্রহণ করার অনুমতি লাভ করেন অর্থাৎ ১৮৮৯ সনেই এই ভবিষ্যদ্বাণীর সত্যায়নকারী প্রতিশ্রুত পুত্রও জন্ম লাভ করেন। যাইহোক হযরত মসীহ মওউদ (আ.)-এর ভাষায় এই ভবিষ্যদ্বাণীর বাক্যাবলী উপস্থাপন করছি। তিনি যে প্রচার লিপি প্রকাশ করেছিলেন এতে বলেন,

‘প্রথম ভবিষ্যদ্বাণী যা স্বয়ং এই অধম সম্পর্কে, আজ ২০শে ফেব্রুয়ারী ১৮৮৬ মোতাবেক ১৫ই জমাদিউল আউয়াল, ইলহামী কালাম সংক্ষেপে নমুনাস্বরূপ লেখা হচ্ছে এবং এর বিস্তারিত পুস্তকে লিপিবদ্ধ করা হবে, ইনশাআল্লাহ তা'লা।’

তিনি (আ.) বলেন,

‘প্রথম ভবিষ্যদ্বাণী “(বিসমিল্লাহি তা'লা ওয়া ই'লামিহি আয্যা ওয়া জাল্লা) পরম করুণাময়, পরম দাতা, মহা মহিমাম্বিত খোদা, যিনি সর্বশক্তিমান (জাল্লা শানুহু ওয়া আয্যা ইসমুহু) যাঁর মর্যাদা মহা গৌরবময় এবং নাম অতি মহান”, নিজ ইলহাম দ্বারা সম্বোধনপূর্বক বলেনঃ আমি তোমাকে ‘করুণার এক নিদর্শন’ দিচ্ছি তুমি যেভাবে তা আমার কাছে চেয়েছো। আমি তোমার সকরণ নিবেদন শুনেছি এবং তোমার দোয়াসমূহকে করুণার সাথে কবুল করেছি এবং তোমার সফরকে (হুশিয়ারপুর ও লুধিয়ানার) তোমার জন্য কল্যাণময় করেছি। সুতরাং শক্তি, দয়া এবং নৈকট্যের নিদর্শন তোমাকে দেয়া হচ্ছে। ফযল এবং অনুগ্রহের নিদর্শন তোমায় দান করা হচ্ছে। আর বিজয় ও সফলতার চাবি তুমি প্রাপ্ত হয়েছো। হে মুযাফ্ফর (বিজয়ী)! তোমার প্রতি সালাম। খোদা বলেছেন, যারা জীবন প্রত্যাশী তারা যেন মৃত্যুর কবল হতে মুক্তি লাভ করে এবং যারা কবরে প্রোথিত তারা বের হয়ে আসে, যাতে ইসলাম ধর্মের শ্রেষ্ঠত্ব এবং আল্লাহ তা'লার কালামের মর্যাদা লোকের কাছে সুপ্রকাশিত হয় এবং সত্য এর যাবতীয় আশিসসহ উপস্থিত হয় এবং মিথ্যা এর যাবতীয় অকল্যাণসহ পলায়ন করে। আর মানুষ বুঝে যে আমি সর্ব শক্তিমান-যা ইচ্ছা করি, করে থাকি এবং যেন তাদেরও প্রতীতি হয়, আমি তোমার সঙ্গে আছি এবং যারা খোদার অস্তিত্বে অস্বীকার করে এবং খোদা ও খোদার ধর্ম, তাঁর গ্রন্থ এবং তাঁর পবিত্র রসূল মুহাম্মদ মুস্তফা (সা.)-কে অস্বীকার করে এবং অসত্য মনে করে থাকে, তারা যেন একটি প্রকাশ্য নিদর্শন প্রাপ্ত হয় এবং অপরাধীদের শাস্তির পথ পরিষ্কার হয়। সুতরাং তুমি সুসংবাদ গ্রহণ কর, এক সুদর্শন এবং পবিত্র পুত্র সন্তান তোমাকে দেয়া হবে। এক মেধাবী পুত্র তুমি লাভ করবে। সেই পুত্র তোমারই ঔরসজাত তোমারই সন্তান হবে। সুশ্রী, পবিত্র পুত্র তোমার মেহমান আসছে। তার নাম আনমুয়ায়েল এবং সুসংবাদ দাতাও বটে। তাকে পবিত্রাত্মা দেয়া হয়েছে এবং তিনি নোংরামী থেকে মুক্ত। তিনি আল্লাহর নূর, তা আশিসপূর্ণ যা আকাশ থেকে আগমন করে। তার সাথে ‘ফযল’ (বিশেষ কৃপা) আছে, যা তার আগমনের সাথে উপস্থিত হবে। সে জাঁকজমক, ঐশ্বর্য ও গৌরবের অধিকারী হবে। সে পৃথিবীতে আসবে এবং তার সঞ্জীবনী শক্তি এবং ‘পবিত্র আত্মার’ প্রসাদে বহু জনকে ব্যাধি মুক্ত করবে। সে কলেমাতুল্লাহ-আল্লাহর বাণী। কারণ খোদার দয়া ও সূক্ষ্ম মর্যাদাবোধ তাকে সম্মানিত বাক্য দ্বারা প্রেরণ করেছেন। সে অত্যন্ত ধীমান, প্রজ্ঞাশীল, হৃদয়বান এবং গান্ধীর্ষশীল হবে। জাগতিক ও আধাত্মিক জ্ঞানে তাকে পরিপূর্ণ করা হবে। সে তিনকে চার করবে (এর অর্থ বুঝিনি)। সোমবার শুভ সোমবার। সম্মানিত প্রিয় পুত্র। মাযহারুল আওয়ালে ওয়াল আখেরে মাযহারুল হাক্কে ওয়াল উলা কা আল্লাল্লাহা নাযালা মিনাস্ সামায়ে। (অর্থাৎ প্রথম এবং শেষ বিকাশ, সত্যের বিকাশস্থল ও সুউচ্চ যেন আল্লাহ আকাশ হতে অবতীর্ণ হয়েছে) তার আগমন অশেষ কল্যাণময় হবে এবং ঐশী গৌরব ও প্রতাপ প্রকাশের কারণ হবে। জ্যোতি আসছে, জ্যোতি। খোদা তাকে তাঁর সন্তুষ্টির সৌরভ নির্বাস দ্বারা সিন্ত করছেন। আমরা তার মধ্যে আপন রুহ ফুঁকে দিবো এবং খোদার ছায়া তার শিরে থাকবে। সে শীঘ্র শীঘ্র বাড়বে এবং বন্দীদের মুক্তির কারণ হবে। আর পৃথিবীর প্রান্তে প্রান্তে প্রসিদ্ধি লাভ করবে। জাতিসমূহ তার কাছ থেকে আশিস লাভ করবে। তখন

তার আত্মিক কেন্দ্র আকাশের দিকে উত্তোলিত হবে, ওয়া কানা আমরান্নাকুযিয়া (অর্থাৎ এটিই আল্লাহ্‌র অটল মীমাংসা)’। (ইশতেহার, ২০শে ফেব্রুয়ারী, ১৮৮৬ ইং)

হুযূর বলেন, এ হলো সেই মহান ভবিষ্যদ্বাণী যা পূর্ণ হবার জন্য তিনি (আ.) আল্লাহ্‌ তা’লার কাছ থেকে সংবাদ পেয়ে ঘোষণা করেন,

‘নয় বছরের মধ্যে এই পুত্র জন্ম লাভ করবে এবং আমি যা বর্ণনা করেছি সে মোতাবেক অসাধারণ গুণসম্পন্ন হবে।’

যদি এর বিস্তারিত বর্ণনা করতে যাই তাহলে অনেক সময় লেগে যাবে তাই সংক্ষেপে বলছি। এই ভবিষ্যদ্বাণীর আলোকে যখন তিনি বিজ্ঞাপন প্রকাশ করেন এর কিছুদিন পর তাঁর ঘরে একটি কন্যা সন্তান জন্ম লাভ করে। তার নাম ছিলো ইসমত। এতে বিরোধীরা অনেক হৈ চৈ আরম্ভ করে বলে, তাঁর ভবিষ্যদ্বাণী মিথ্যা প্রতিপন্ন হয়েছে। তিনি (আ.) বলেন,

আমিতো সময় নির্ধারণ করে দিয়েছিলাম একথা বলিনি যে অচিরেই জন্ম নিবে।

যাইহোক, পুনরায় কিছুদিন পর আরেক ছেলে জন্ম নেয় আর তার নাম বশীর রাখা হয় এবং তাকে বশীর আউয়াল বলা হয়। কিন্তু কিছুকাল পর শিশুকালেই সেও মারা যায়। তখনও বিরুদ্ধবাদীরা প্রচণ্ড হৈ চৈ আরম্ভ করে। বরং এই দু সন্তান জন্মের পূর্বেই যখন তিনি ভবিষ্যদ্বাণী করেছিলেন তখন পণ্ডিত লেখরাম অত্যন্ত জঘন্য ভাষায় তাঁর ভবিষ্যদ্বাণীর প্রতিটি বাক্যকে মিথ্যা আখ্যা দিয়ে খন্ডন করেছিল। উদাহরণস্বরূপ, ভবিষ্যদ্বাণীর একটি শব্দকোষ হচ্ছে,

‘এক মেধাবী পুত্র তুমি লাভ করবে। সেই পুত্র তোমারই ঔরসজাত তোমারই সন্তান হবে।’

এর মোকাবিলায় লেখরাম লিখেছিল,

‘আমাকেও খোদা বলেছেন, তোমার বংশধারা অতল্প সময়ের মধ্যেই লুপ্ত হয়ে যাবে। সর্বোপরি তিন বছর পর্যন্ত প্রসিদ্ধি পাবে, যদি কোন পুত্র জন্মও নেয় তাহলে সে রহমত নয় বরং দুঃখ-বেদনার নিদর্শন হবে’।

নাউযুবিল্লাহ্‌! আরো অনেক বকবক সে করেছে। হযরত মসীহ্‌ মওউদ (আ.) অত্যন্ত জোড়ালো ভাষায় পণ্ডিত লেখরামের এসব ঔদ্ধতুপূর্ণ বক্তব্য খন্ডন করেছেন।

১২ই জানুয়ারী ১৮৮৯সনে ভবিষ্যদ্বাণীর তিন বছরের মাথায় এই পুত্র জন্ম গ্রহণ করেন এবং তাঁর নাম মির্যা বশীর উদ্দিন মাহমুদ আহমদ রাখা হয়। হযরত মসীহ্‌ মওউদ (আ.) ১৮৯৪ সনে রচিত নিজ গ্রন্থ ‘সিররুল খিলাফাহ্‌’তে লিখেন,

‘বশীর নামে আমার এক ছোট্ট শিশু পুত্র ছিল। (এখানে বশীর বলতে প্রথম বশীর এর কথা বুঝানো হয়েছে) দুধ খাওয়ার বয়সেই আল্লাহ্‌ তা’লা তাকে মৃত্যু দেন। তখন আল্লাহ্‌ তা’লা আমার প্রতি ওহী করলেন, আমরা তোমার প্রতি অনুগ্রহস্বরূপ তাকে ফেরত পাঠাবো, একইভাবে তার মা-ও স্বপ্নে দেখেছেন, বশীর ফিরে এসেছে আর বলছে, আমি আপনার সাথে অত্যন্ত ভালবাসার সাথে সাক্ষাত করবো এবং হঠাৎ করে ছেড়ে চলে যাবো না। এই ইলহাম ও রুইয়ার পর আল্লাহ্‌ তা’লা আমাকে আরও একটি পুত্র সন্তান দান করেন। তখন আমি বুঝলাম, সর্বজ্ঞানী খোদা সত্য বলেছেন, সে-ই বশীর (প্রতিশ্রুত) এবং তার নামানুসারে আমি এর নাম বশীরই রাখলাম আর আমি এর মাঝে প্রথম বশীরের অবয়ব দেখতে পেলাম’। (সিররুল খিলাফাহ্‌-রুহানী খাযায়ন-৮ম খন্ড, পৃ: ৩৮১)

এরপর হুয়ূর এই ভবিষ্যদ্বাণীতে বর্ণিত গুরুত্বপূর্ণ কয়েকটি পয়েন্ট নিয়ে আলোকপাত করেন এবং তা পূর্ণ হওয়া সম্পর্কে বিভিন্ন গণ্যমান্য অ-আহ্মদীর সাক্ষ্য তুলে ধরেন। হযরত মুসলেহ্ মওউদ (রা.) ১৯৪৪ সনে খোদার পক্ষ থেকে জ্ঞাত হয়ে স্বয়ং নিজেকে মুসলেহ্ মওউদ বলে দাবী করেন।

একজন সম্মানিত অ-আহ্মদী আলেম মৌলভী সামীউল্লাহ্ খান ফারুকী সাহেব পাকিস্তান প্রতিষ্ঠার পূর্বে ‘ইযহারে হক্’ শীর্ষক একটি কলামে লিখেন:

‘তিনি [অর্থাৎ হযরত মসীহ্ মওউদ (আ:)] জ্ঞাত হন, ‘আমি তোমার জামাতের জন্য তোমার বংশধর হতে এক ব্যক্তিকে দন্ডায়মান করবো এবং তাঁকে আমার নৈকট্য এবং ওহীর মর্যাদায় ভূষিত করবো এবং তার মাধ্যমে সত্য উন্নতি লাভ করবে এবং বহু মানুষ সত্য গ্রহণ করবে।’ এই ভবিষ্যদ্বাণী পাঠ কর এবং বারংবার পাঠ কর। এরপর ঈমানদারীর সাথে বলো যে, এই ভবিষ্যদ্বাণী কি পূর্ণ হয়নি? যে সময় এই ভবিষ্যদ্বাণী করা হয়েছিল তখন বর্তমান খলীফা কেবলমাত্র শিশু ছিলেন এবং মির্যা সাহেবের পক্ষ হতে তাকে খলীফা নিযুক্ত করার কোন প্রকার ওসীয়াতও করা হয়নি বরং খলীফা নির্বাচন করা সাধারণ মানুষের মতামতের উপর ছেড়ে দেয়া হয়েছিল। অতএব যখন অধিকাংশ মানুষ হাকীম নূরউদ্দীন (রা.)-কে খলীফা হিসেবে গ্রহণ করে নেয় তখন বিরোধীরা উপরোক্ত ভবিষ্যদ্বাণীতে বর্ণিত বক্তব্য নিয়ে হাসি-ঠাট্টাও করেছে। কিন্তু হাকীম সাহেবের তিরোধানের পর মির্যা বশীর উদ্দিন মাহমুদ আহমদ খলীফা নিযুক্ত হন এবং এটি বাস্তবতা যে, তাঁর যুগে আহ্মদীয়াত যতটা উন্নতি করেছে তা বিস্ময়কর। স্বয়ং মির্যা সাহেবের যুগেও আহ্মদীদের সংখ্যা খুবই অল্প ছিলো, খলীফা নূরউদ্দীন সাহেবের যুগেও তেমন কোন উন্নতি হয়নি কিন্তু বর্তমান খলীফার সময় মির্যাইয়াত বিশ্বের প্রায় সকল ভূখণ্ডে পৌঁছে গেছে এবং অবস্থা বলছে, আগামী আদমশুমারীতে মির্যায়ীদের সংখ্যা ১৯৩১ এর তুলনায় দ্বিগুণেরও বেশি হয়ে যাবে। উপরন্তু তার যুগে বিরুদ্ধবাদীদের পক্ষ থেকে মির্যাইয়াত (আহ্মদীয়াত)-কে নির্মূল করার জন্য যতটা সম্মিলিত প্রচেষ্টা হয়েছে ইতোপূর্বে তা কখনো হয়নি।’

এটি একজন অ-আহ্মদীর বক্তব্য। তিনি কিছুটা হলেও সত্য লিখতে জানতেন, বর্তমান যুগের উলামাদের মত পুরোপুরি অন্ধ ছিলেন না।

‘মোকটথা ভবিষ্যদ্বাণী অনুযায়ী তাঁর বংশধর থেকে এক ব্যক্তিকে জামাতের জন্য দন্ডায়মান করা হয় এবং তার মাধ্যমে জামাত বিশ্বয়করভাবে উন্নতি করে। এতে সুস্পষ্টভাবে প্রতিপন্ন হয় যে, মির্যা সাহেবের ভবিষ্যদ্বাণী হুবহু পূর্ণ হয়েছে।’

এরপর প্রতিশ্রুত পুত্র সম্পর্কে ভবিষ্যদ্বাণীতে এটিও বলা হয়েছিলো,

‘যাতে ইসলাম ধর্মের শ্রেষ্ঠত্ব এবং আল্লাহ্ তা’লার কালামের মর্যাদা লোকের কাছে সুপ্রকাশিত হয়’

এ ব্যাপারেও অ-আহ্মদীদের সাক্ষ্য শুনুন যে তারা কি বলেছেন। ‘জমিদার’ পত্রিকায় মৌলভী জাফর আলী খাঁ সাহেব যিনি প্রসিদ্ধ মুসলিম নেতা এবং সুবক্তা ছিলেন তিনি লিখেছেন,

‘কান খুলে শোন! তোমরা এবং তোমাদের সাজপাঙ্গরা কিয়ামত পর্যন্ত মির্যা মাহমুদের মোকাবিলা করতে পারবে না। মির্যা মাহমুদের কাছে কুরআন এবং কুরআনের জ্ঞান আছে। তোমাদের কাছে এমন কি আছে?.....তোমরা কখনও স্বপ্নেও কুরআন পড়নি.....মির্যা মাহমুদের কাছে এমন জামাত আছে যারা তাঁর ইশারায় তন-মন-ধন তাঁর পদতলে উৎসর্গ করতে প্রস্তুত।.....মির্যা মাহমুদের কাছে মুবাল্লেগ আছে, বিভিন্ন জ্ঞানে অভিজ্ঞ মানুষ রয়েছে। বিশ্বের সকল দেশে তিনি পতাকা প্রোথিত করে রেখেছেন।’

একজন প্রসিদ্ধ সাংবাদিক খাজা হাসান নিয়ামী দেহলভী তাঁর (রা.) সম্বন্ধে লিখেন,

‘অধিকাংশ সময় অসুস্থ থাকেন কিন্তু রোগ-ব্যাদি তার দৈনন্দিন কর্মকাণ্ডে কোনরূপ ব্যাঘাত সৃষ্টি করতে পারেনি। তিনি প্রবল বিরোধিতার সময়ও ঠান্ডা মাথায় কাজ করে স্বীয় মোঘলী বিচক্ষণতা প্রমাণ করেছেন। আর এটিও জানা কথা যে মোঘলরা নেতৃত্ব প্রদানের বিশেষ ক্ষমতা রাখে, রাজনৈতিক দূরদর্শিতা এবং ধর্মীয় জ্ঞান ও প্রজ্ঞায় বুৎপত্তি রাখে এবং যুদ্ধ কৌশলও জানে। অর্থাৎ জ্ঞান ও কলমের যুদ্ধে অভিজ্ঞ।’

হুযূর (আই.) বলেন, এরপর ভবিষ্যদ্বাণীতে আরেকটি শব্দকোষ ছিলো,

‘বন্দীদের মুক্তির কারণ হবে’

এই ভবিষ্যদ্বাণীও কত মহিমার সাথে পূর্ণ হয়েছে তা দেখুন! আজ আমাদের সম্পর্কে বলা হয়, আমরা নাকি জিহাদ বিরোধী, কাশ্মীরীদের বিরোধী। কিন্তু হযরত মুসলেহ্ মওউদ (রা.) যে চেষ্টি বা উদ্যোগ নিয়েছিলেন, সে সম্পর্কে কিছু তথ্য তুলে ধরছি। কাশ্মীরের স্বাধীনতা আন্দোলন তিনিই আরম্ভ করেছিলেন কেননা ‘অল ইন্ডিয়া কাশ্মীর’ নামে যে কমিটি বানানো হয়েছিল এর নেতৃত্ব প্রদানের দায়িত্ব তাঁর উপর ন্যস্ত ছিলো। আর অনেক বড় বড় মুসলমান নেতা এই কমিটির সদস্য ছিলেন। যেমন, স্যার জুলফিকার আলী খান, ড. ইকবাল, খাজা হাসান নিয়ামী, সৈয়দ হাবীব, বিভিন্ন পত্রিকার সম্পাদক এবং রাজনীতিবিদ প্রভৃতি। এদের সবার পরামর্শক্রমে হযরত খলীফাতুল মসীহ্ সানী (রা.)-কে এই কমিটির সভাপতি মনোনীত করা হয়। আল্লাহ্ তা’লার ফযলে এর মাধ্যমে দীর্ঘদিন ধরে নূন্যতম মানবাধিকার থেকে বঞ্চিত সেসব কাশ্মীরি মুসলমানদেরকে স্বাধীনতা প্রদান করা হয়। মুসলিম প্রেস হযরত মুসলেহ্ মওউদ (রা.)-র এই সুমহান কর্মের স্বীকৃতি প্রদান এবং তাঁর ভূয়সী প্রশংসা করতে গিয়ে একথাও লিখেছে,

‘যে যুগে কাশ্মীরের অবস্থা অত্যন্ত সঙ্গীর্ণ ছিলো এবং তখন যারা ধর্মীয় মতবিরোধ থাকা সত্ত্বেও মির্যা সাহেবকে সভাপতি মনোনীত করেছিলেন তারা কর্মের সফলতাকে দৃষ্টিপটে রেখে অতি উত্তম নির্বাচন করেছিলেন। সেসময় যদি ধর্মীয় মতানৈক্যের কারণে মির্যা সাহেবকে মনোনীত না করা হতো তাহলে আন্দোলন পুরোপুরি ব্যর্থ হতো এবং এই জাতি চরমভাবে ক্ষতিগ্রস্ত হতো।’

সৈয়দ হাবীব সাহেব একজন প্রসিদ্ধ সাংবাদিক এবং লাহোর থেকে প্রকাশিত ‘সিয়াসত’ পত্রিকার সম্পাদক আর ‘অল ইন্ডিয়া কাশ্মীর’ কমিটিরও সদস্য ছিলেন। যখন হযরত মুসলেহ্ মওউদ (রা.) এই কমিটির সভাপতির দায়িত্ব থেকে পদত্যাগ করেন তখন তিনি তার পত্রিকার ১৮ই মে, ১৯৩৩ এর সংখ্যায় লিখেন:

‘আমার জ্ঞান মতে স্বীয় উন্নত যোগ্যতা সত্ত্বেও ড. ইকবাল এবং মালেক বরকত আলী সাহেব উভয়ে এই কাজ করতে সক্ষম হবে না। ফলে বিশ্ববাসীর সামনে এটি সুস্পষ্ট হয়ে যাবে, যে যুগে কাশ্মীরের অবস্থা শোচনীয় ছিলো সেযুগে যারা ধর্মীয় মতানৈক্য সত্ত্বেও মির্যা সাহেবকে সভাপতি নির্বাচিত করেছিল তারা কর্মের সফলতার প্রতি দৃষ্টি রেখে সর্বোত্তম কাজ করেছিল। সেসময় ধর্মীয় মতবিরোধের কারণে মির্যা সাহেবকে যদি নির্বাচিত না করা হতো তাহলে এই আন্দোলন সম্পূর্ণরূপে ব্যর্থ হতো এবং উন্নতে মুসলেমার চরম ক্ষতি হতো। আমার মতে, মির্যা সাহেবের পদত্যাগ কমিটির জন্য মৃত্যুতুল্য। সংক্ষেপে, আমাদের নির্বাচনের কারণ এখন বিশ্ববাসীর কাছে পরিষ্কার হয়ে যাবে।’

অর্থাৎ এখন বুঝা যাবে যে কাশ্মীরি কমিটি কতটা কাজ করতে পারে আর এর বাস্তবতা বিশ্ব দেখেছে।

হুযূর বলেন, কাশ্মীরবাসীকে তিনি (রা.)-ই বন্দীদশা থেকে মুক্তি করেছেন। তিনি (রা.) স্বয়ং এর কাহিনী বলেছেন:

‘একবার আমরা কাশ্মীর গিয়েছিলাম। আমাদের কাছে যথেষ্ট মালপত্র ছিলো। তাই আমি একজন সরকারী অফিসারকে বললাম, আমাদের জন্য একজন কুলীর ব্যবস্থা করুন। রাস্তা দিয়ে একজন হেঁটে যাচ্ছিল তাকে ডেকে বলল, এদিকে আস এরপর তার মাথায় মালপত্র তুলে দেয়া হয়। কিছুদূর যাবার

পর সেইলোক খুবই কাহিল হয়ে পড়ে। আমি বললাম, কাশ্মীররাতো যথেষ্ট শক্তিশালী হয়। আর তুমি যে মালপত্র বইতে পারছো না। সে বললো, আমিতো নিজ অঞ্চলের অনেক বড় এক জমিদার! আজ আমি বিয়ে করতে যাচ্ছি। রাস্তা দিয়ে হেঁটে যাচ্ছিলাম আর সে জোর করে আমার মাথায় মালপত্র চাপিয়ে দিয়েছে। যেহেতু এদের রাজত্ব তাই আমরা টু শব্দ পর্যন্ত করতে পারি না। এই ছিলো কাশ্মীরবাসীর অবস্থা। ভালো অবস্থাপন্ন ঘরের মানুষও একজন সাধারণ সরকারী অফিসারের সামনে কিছু বলার ক্ষমতা রাখতো না’।

হুযূর বলেন, এরপর পার্থিব ও আধ্যাত্মিক জ্ঞান অর্থাৎ পবিত্র কুরআনের জ্ঞান সম্পর্কে অ-আহমদীদের মতামত কী? মাসিক ‘নিগার’ পত্রিকার সম্পাদক আল্লামা নিয়ায ফতেহপুরী সাহেব লিখেন,

‘তফসীরে কবীরের তৃতীয় খন্ড বর্তমানে আমার সামনে আছে। আর আমি অত্যন্ত মনোযোগের সাথে তা অধ্যয়ন করছি। এতে কোন সন্দেহ নেই, কুরআন অধ্যয়নের একটি ধারা তিনি সূচনা করেছেন এবং এই তফসীর নিজ বর্ণনার দিক থেকে একেবারেই প্রথম একটি তফসীর যাতে অত্যন্ত প্রাঞ্জলভাবে জ্ঞান ও ইতিহাসের সমন্বয় ঘটানো হয়েছে। তাঁর জ্ঞানের প্রখরতা, তাঁর দূরদৃষ্টি, তাঁর অসাধারণ অন্তর্দৃষ্টি এবং বিচক্ষণতা, তাঁর যুক্তি-প্রমাণের সৌন্দর্য এর প্রতিটি বাক্য থেকে সুস্পষ্টভাবে প্রতিপন্ন হয়। হায় পরিতাপ! আমি কেন এ পর্যন্ত অনবহিত ছিলাম। হায়! আমি যদি এর সবগুলো খন্ড দেখতে পেতাম। গতকাল সূরা হুদ এর তফসীরে হযরত লূত (আ.) সম্পর্কে তাঁর তফসীর পড়ে মন আনন্দে ভরে গেছে ফলে এই পত্র লিখতে বাধ্য হচ্ছি। তিনি ﷺ ’র তফসীর করতে গিয়ে সাধারণ মুফাস্সেরদের থেকে পৃথক যে অনন্য মতামতের অবতারণা করেছেন তা বিচার করার ক্ষমতা আমার নেই। খোদা আপনাকে দীর্ঘায়ু দিন।’

এরপর পবিত্র কুরআনের জ্ঞান সম্পর্কে মওলানা আব্দুল মাজেদ দরিয়াবাদী লিখেন:

‘কুরআন এবং কুরআনী জ্ঞানের বিশ্বময় প্রচার এবং তিনি তাঁর দীর্ঘজীবনে বীরত্ব এবং সাহসিকতার সাথে বিশ্বব্যাপী ইসলাম প্রচারের জন্য যে চেষ্টা-প্রচেষ্টা চালিয়ে গেছেন আল্লাহ তা’লা তাঁকে এর উত্তম পুরস্কার দিন। জ্ঞানের আলোকে কুরআনের সত্যতা এবং তত্ত্বজ্ঞান সম্পর্কিত যে ব্যাখ্যা-বিশ্লেষণ ও অনুবাদ তিনি করে গেছেন এরও একটি উন্নত ও স্বাভাবিক বৈশিষ্ট্য রয়েছে।’

পার্থিব জ্ঞানে পরিপূর্ণ করা সম্পর্কে স্বয়ং হযরত মুসলেহ্ মওউদ (রা.) লিখেন:

‘ভবিষ্যদ্বাণীর মর্মার্থ হচ্ছে, তিনি পার্থিব জ্ঞান কারো কাছ থেকে আহরণ করবেন না বরং খোদার পক্ষ থেকে তাকে এই জ্ঞান শিখানো হবে।’

পুনরায় তিনি বলেন,

‘এখানে পার্থিব জ্ঞান বলতে অংকশাস্ত্র এবং বিজ্ঞান ইত্যাদি হতে পারে না। কেননা এখানে ‘পরিপূর্ণ করা হবে’ এ বাক্য রয়েছে যা সুস্পষ্টভাবে জ্ঞাত করে, খোদা তা’লার পক্ষ হতে তাঁকে জ্ঞান শিক্ষা দেয়া হবে। আর খোদার পক্ষ হতে বিজ্ঞান, অংকশাস্ত্র এবং ভূগোল প্রভৃতির জ্ঞান শিখানো হয় না বরং ধর্ম এবং কুরআন শিখানো হয়। অতএব ভবিষ্যদ্বাণীর এই বাক্য ‘তাকে জাগতিক জ্ঞানে পরিপূর্ণ করা হবে’ এর তাৎপর্য হচ্ছে, তাকে আল্লাহ তা’লার পক্ষ হতে ধর্মীয় জ্ঞান এবং কুরআন শিখানো হবে এবং খোদা স্বয়ং তার শিক্ষক হবেন।’

পুনরায় তিনি (রা.) বলেন,

‘এই ভবিষ্যদ্বাণীতে দ্বিতীয় সংবাদ যা দেয়া হয়েছে তাহলো, ‘তাকে আধ্যাত্মিক জ্ঞানে পরিপূর্ণ করা হবে।’ আধ্যাত্মিক জ্ঞান দ্বারা সেই বিশেষ জ্ঞানকে বুঝায় যা আল্লাহ তা’লার বিশেষত্ব। যেমন:

অদৃশ্যের জ্ঞান, যা তিনি তাঁর এমন বান্দার নিকট প্রকাশ করেন যার উপর তিনি এই পৃথিবীতে বিশেষ কোন দায়িত্ব ন্যস্ত করেন। যদ্বারা খোদা তা'লার সাথে তাঁর সম্পর্ক প্রকাশ পায় এবং তার মাধ্যমে মানুষের ঈমান সতেজ করতে পারেন।’

আল্লাহ তা'লা তাঁকে বিভিন্ন যে সংবাদ দিয়েছেন তাও অগণিত। এ প্রসঙ্গে তিনি (রা.) একটি স্বপ্নের উল্লেখ করতে গিয়ে বলেন,

‘আমাকে সেই যুদ্ধ সম্বন্ধে অবহিত করা হয়েছে এবং তা আশ্চর্যজনকভাবে পূর্ণ হয়েছে (দ্বিতীয় বিশ্বযুদ্ধের কথা)। একবার স্বপ্নে দেখলাম, আমি যুক্তরাজ্যে গিয়েছি এবং বৃটিশ সরকার আমাকে বলছে, আপনি আমাদের দেশের নিরাপত্তা বিধান করুন। আমি তাকে বললাম, প্রথমে আমাকে তোমাদের সমরাস্ত্র সম্পর্কে জরিপ করতে দাও। এরপর বলতে পারবো আমি তোমার দেশের নিরাপত্তা নিশ্চিত করতে পারবো কী-না। এরপর সরকার আমাকে তাদের সমস্ত যুদ্ধ সম্পর্কিত বিভাগ দেখায় এবং আমি সেগুলো ঘুরে ঘুরে দেখতে থাকি। অবশেষে আমি বললাম, কেবল উড়োজাহাজের ঘাটতি রয়েছে। যদি উড়োজাহাজ পেয়ে যাই তবে আমি যুক্তরাজ্যের নিরাপত্তা বিধানের দায়িত্ব পালন করতে পারবো। একথা বলামাত্রই দেখি যুক্তরাষ্ট্র হতে একটি তারবার্তা এসেছে যার বক্তব্য হচ্ছে:- **The American Government has delivered 2800 Aeroplanes to the British Government** অর্থাৎ ‘যুক্তরাষ্ট্র সরকার বৃটিশ সরকারকে ২৮০০ উড়োজাহাজ দিয়েছে।’ এরপর আমার ঘুম ভেঙে যায়।’

তিনি (রা.) বলেন,

‘এ স্বপ্ন আমি চৌধুরী জাফরউল্লাহ খান সাহেবকেও শুনিয়েছিলাম। কিছুদিন পর আমি একদিন মসজিদে বসেছিলাম। শুনলাম আমার ফোন এসেছে। গিয়ে জানতে পারলাম, চৌধুরী জাফরউল্লাহ খান সাহেব ফোন করেছেন। তিনি বললেন, আপনি পত্রিকায় খবর পড়েছেন কি? আমি বললাম, না পড়িনি। তিনি বলেন, আপনার স্বপ্ন পূর্ণ হয়েছে। এখনই একটি সাকুলার এসেছে যা প্রথমে সংশ্লিষ্ট দপ্তরে এসেছিল, এখন পত্র-পত্রিকায়ও এসে গেছে, যুক্তরাষ্ট্র সরকার বৃটিশ সরকারকে ২৮০০ যুদ্ধজাহাজ দিয়েছে।’

হযূর বলেন, ‘খোদার ছায়া তার শিরে থাকবে’ ভবিষ্যদ্বাণীর এ শব্দকোষও বহুবার বিভিন্নভাবে পূর্ণ হয়েছে। তিনি (রা.) বলেন,

‘দেখুন! আল্লাহ তা'লা কীভাবে এই ইলহামের সত্যায়নে অনবরত আমাকে হিফায়ত এবং সাহায্য করছেন। এ যাবৎ আমার উপর এমন কোন ইলহাম অবতীর্ণ হয়নি যার ভিত্তিতে আমি বলতে পারি যে, কোন মানুষের হাতে আমি মৃত্যুবরণ করবো না। কিন্তু এটি আমার দৃঢ় বিশ্বাস, যতদিন আমার কাজ অসম্পূর্ণ থাকবে ততদিন কেউ আমাকে হত্যা করতে পারবে না। অনবরত আমার সাথে এমন ঘটনা ঘটেছে, মানুষ আমাকে হত্যা করতে চেয়েছে কিন্তু আল্লাহ তা'লা তাঁর অপার কৃপায় তাদের আক্রমণ হতে আমাকে নিরাপদ রেখেছেন।’

হযূর বলেন, ভবিষ্যদ্বাণীতে আরেকটি বিষয় ছিলো, ‘পৃথিবীর প্রান্তে প্রান্তে প্রসিদ্ধি লাভ করবে’। আল্লাহ তা'লার অপার কৃপায় এ ভবিষ্যদ্বাণীও হযরত মুসলেহ মওউদ (রা.)-র যুগে অত্যন্ত মহিমার সাথে পূর্ণ হয়েছে এবং পৃথিবীতে অনেকগুলো মিশনহাউস প্রতিষ্ঠিত হয়। তাঁর যুগে সিলোন, মরিশাস, সূমাত্রা, জাভা, স্ট্রেটস সেটেলম্যান্টস, চীন, জাপান, বোখারা, রাশিয়া, ইরান, ইরাক, সিরিয়া, ফিলিস্তিন, মিসর, সুদান, আবিসিনিয়া, চেকোস্লোভাকিয়া, পোল্যান্ড, আলবানিয়া, যুক্তরাষ্ট্র, যুগোস্লাভিয়া, আর্জেন্টিনা ইত্যাদি প্রায় ৩৪/৩৫ টি দেশে মিশনহাউস প্রতিষ্ঠিত হয় এবং ইসলাম প্রচার ছড়িয়ে পড়ে। (পরবর্তীতে অবশ্য বেশ কিছু মিশনহাউস বন্ধও হয়ে যায়। তিনি (রা.) বলেন,

‘এভাবে সহস্র সহস্র সদাত্মা আমার প্রচেষ্টায় ইসলাম গ্রহণ করেন এবং আমার মাধ্যমে ইসলাম ও আহ্মদীয়াতের যে প্রচার ও প্রসার হয়েছে তা পুরো বিশ্ববাসী অবহিত আছে।’

এই ভবিষ্যদ্বাণীর শ্রেষ্ঠত্ব বর্ণনা করতে গিয়ে হযরত মসীহ মওউদ (আ.) বলেন,

‘চোখ খুলে দেখা উচিত, এটি শুধু একটি ভবিষ্যদ্বাণীই নয় বরং এটি একটি মহান ঐশী নিদর্শন যাকে মহা প্রতাপশালী খোদা পরম মমতাসীল ও আমাদের প্রিয় নবী মুহাম্মদ (সা.)-এর সত্যতা ও শ্রেষ্ঠত্ব প্রমাণের জন্য প্রকাশ করেছেন এবং সত্যিকার অর্থে এটা মৃতকে জীবন্ত করার চেয়েও শতগুণ উন্নত পরিপূর্ণ, শ্রেষ্ঠ এবং উত্তম নিদর্শন। কেননা মৃতকে জীবিত করার অর্থ হচ্ছে, খোদার দরবারে দোয়া করে এক সদাত্মা কামনা করা। অপার করুণা এবং অনুগ্রহ বশত হযরত খাতামুল আম্বিয়া (সা.)-এর অনন্ত আশিস ও কল্যাণে আল্লাহ তা’লা এই অধমের দোয়া কবুল করত এমন বরকতময় রুহ প্রেরণের প্রতিশ্রুতি দিয়েছেন, যার পার্থিব ও আধ্যাত্মিক কল্যাণ গোটা বিশ্বে প্রসার লাভ করবে। যদিও এই নিদর্শন মৃতকে জীবিত করার তুল্য মনে হয় কিন্তু অভিনিবেশ সহকারে দৃষ্টি দিলে জানা যাবে যে, এই নিদর্শন মৃতকে জীবন্ত করার চেয়ে শতগুণ শ্রেয়। মৃতের আত্মাও দোয়ার মাধ্যমেই প্রত্যাবর্তন করে আর এস্থলেও দোয়ার মাধ্যমে একটি রুহ কামনা করা হয়েছে। কিন্তু সেই রুহ আর এই রুহের মধ্যে লক্ষ ক্রোশ ব্যবধান রয়েছে। যারা মুসলমানদের মধ্যে লুক্কায়িত মুরতাদ তারা মহানবী (সা.)-এর মু’জেয়াসমূহ বিকশিত হতে দেখে আনন্দিত হয় না বরং তারা এমন কেন হল বলে চরম দুঃখ পায়।’

সবশেষে হুযূর বলেন, অতএব ভবিষ্যদ্বাণীর প্রেক্ষাপট, গুরুত্ব এবং তদসংক্রান্ত কিছু ঘটনা আমি সংক্ষেপে তুলে ধরেছি এবং এ ভবিষ্যদ্বাণীর শান ও মর্যাদা কী তা আমরা হযরত মসীহ মওউদ (আ.)-এর এই শেষ উদ্ধৃতিতে শুনেছি। তাই আমি আশা করবো, এখন সেসব আহ্মদী যারা অজ্ঞানতার কারণে বিভিন্ন স্থান হতে চিঠিপত্র লিখেন এবং কখনো কখনো এখানেও প্রশ্ন করে থাকেন। তারা প্রশ্ন করেন, আমরা মুসলেহ্ মওউদ দিবস কেন পালন করি এবং অন্যান্য খলীফার দিবস পালন করি না কেন? তাদের জন্য এখন সুস্পষ্ট হয়ে থাকবে যে, মুসলেহ্ মওউদ সংক্রান্ত ভবিষ্যদ্বাণীর দিনটি আমাদের ঈমানকে সতেজ করা এবং এই অঙ্গীকার স্মরণ করার জন্য উদযাপন করা হয়, আমাদের জীবনের মূল উদ্দেশ্য হচ্ছে ইসলামের সত্যতা এবং মহানবী (সা.)-এর সত্যতা বিশ্বের দরবারে প্রতিষ্ঠা করা। এটি তাঁর জন্ম বা মৃত্যু বার্ষিকীর দিন নয়। হযরত মসীহ মওউদ (আ.)-এর দোয়া কবুল করে আল্লাহ তা’লা তাঁর বংশ থেকে এক ব্যক্তির জন্মের নিদর্শন দেখিয়েছিলেন। অসাধারণ গুণাবলীর অধিকারী হিসেবে যঁার উপর বিশ্ব মাঝে ইসলামের সত্যতা প্রতিপন্ন করার দায়িত্ব ন্যস্ত ছিলো এবং তিনি তা করেছেনও। আর নেয়ামে জামাতের জন্য এমন ব্যবস্থাপনা প্রবর্তন করেছেন যার উপর পদচারণা করে পরবর্তীতে আগমনকারীরাও উন্নতির সোপান অতিক্রম করতে থাকবে। সুতরাং এদিনটি আমাদেরকে সর্বদা আমাদের দায়িত্ব সম্পর্কে সচেতন করিয়ে ইসলামের উন্নতির জন্য স্বীয় সামর্থ্য ও যোগ্যতা প্রয়োগের প্রতি মনোযোগ আকৃষ্ট করে এবং করা উচিত। একটি নিদর্শন পূর্ণ হওয়া উপলক্ষে জ্ঞানের স্বাদ উপভোগ করাই যথেষ্ট নয়। আল্লাহ তা’লা আমাদেরকে এর তৌফীক দিন।

(প্রাপ্ত সূত্র: কেন্দ্রীয় বাংলা ডেস্ক, লন্ডন)